

L'etnia ungaraisa en Rumenia

Ferma identitad en Transilvania

DA GUIU SOBIELA-CAANITZ

■ **La Rumenia (strusch 20 milliuns olmas) è in pajais latin cun ina ferma minoritad da lingua ungaraisa, la principala da quellas en ils set stadis limittrofs da l'Ungaria (1). Il stadi rumen è naschì 1862; enfin a 1920 separava l'artg da las Carpatas (2544 m al Piz Moldoveanu) la Rumenia da l'Ungaria habsburgaisa.** Lur ha il contract da pasch da Trianon fixà il nov cunfin nord-vest e vest da la Rumenia (1281 km), confermà 1947 a Paris. Vasts territoris antruras ungarais, oravant tut la Transilvania, èn oz rumens. Il 2002 viveva ina

ferma maioritad da lingua ungaraisa en ils districts da Harghita (85,3%) e Covasna (74,9%) ed ina ferma minoritad en quel da Mures (39,8%) cun la citad da Târgu Mures/Marosvásárhely; lezs trais districts fan part dal Pajais sicul (Székelyföld) en la Transilvania da l'ost, al pe da las Carpatas. Il num dals Siculs, per tudestg «Szekler», è vegnì famus en la gastronomia da l'Europa centrala grazia al poet Sándor Petöfi (1823–1849) che ha dà lur num ad in recept da gulasch («Székelygulyás»).

Il geograf Béla Filep (Universitad da Berna) scriva en la «NZZ» dals 15 da matg: «Il 2011 vivevan 1 200 000 Unga-

rais etnics en Rumenia, 570 000 da quels en il Pajais sicul (...). Emigraziun ed assimilaziun han sminuì lur dumber. Attila Korodi, manader da la principala partida da la minoritad en il parlament rumen [UDMR], di: 'Cun l'autonomia lain nus stgaffir las cundiziuns da nossa sopravvivenza a lunga vista sco cuminanza' (...). Il parlament rumen sa mussa oz gudent senza cumpromiss areguard lez postulad (...). Perquai provan ils Siculs d'internazionalisar dapli lur pretensiuns (...) tras contacts cun autras regiuns gia autonomas (...). Da lur festa commemorativa [dals 10 da mars 2018] a Târgu Mures han fatg part oraturs da la Cata-

lugna, dal Pajais basc e da l'Italia (...) che han stimulà ils Siculs d'aspirar a l'autonomia (...). Balázs Izsák, parsura dal cussegl naziunal sicul, ha declerà: 'Nus dumandain mo quai che Catalans, Bascs e Sidtirolais han già' (...). Pliras minoritads naziunalas han mess ad ir il comité d'acziun europeic 'Minority SafePack' (...) firmà dad 1 200 000 burgaisas e burgais da l'Uniun europeica (...). Passa 300 000 da las sutscrizziuns [pia 25%] provegnivan da la Rumenia» (p. 9). L'adressa electronica tuna: «<http://www.minority-safepack.eu>». Il comité è represchentà da Hans Heinrich Hansen (Egernsund/Danemarc; hans.heinrich.

hansen@minority-safepack.eu) e cumpiglia t. a. Valentin Inzko, aut represchentant da l'Uniun europeica (UE) en Bosnia-Erzegovina, e l'anteriura cussegliera governativa Anke Spoorendonk per la minoritad danaisa dal Schleswig tudestg. La finamira da «Minority SafePack» tuna sco suonda: «Nus supplitgain l'UE da proteger meglier las personas da las minoritads naziunalas e linguisticas e da rinforzar sia varietad culturala e linguistica» (2).

1. Austria, Croazia, Rumenia, Serbia, Slovachia, Slovenia, Ucraina.

2. <http://ec.europa.eu/citizens-initiative/public/initiatives/open/details/2017/000004?lg=de>